



Namba 279

Bilong wik Long long 11 Ogos 1979

Tumas pawa long plis

Julia Daia i raitim

Planti Nesenel lida i no laikim dispela pasin Gavman i mekim long ol Hailans provins. Em long salim ol plisman i go long bosim strong tru Lo na Oda, namel long ol pipel long ol dispela hap.

Lida bilong Pipels Progres Pati, Mista Julius Chan, i tok long taim selp gavman i kamap i kam inap long independens, Gavman i bringim planti kain kain tingting. Ol kain kain tingting olsem viles kot, provinsal gavman, na ol nara-pela kain tingting olsem.

Na tu em i tok, Gavman i rausim ol kiap, tasol ol i no kamapim wanpela gutpela we bilong kisim ples bilong ol kiap.

Ol dispela planti kain kain tingting nau i wok long paulim ol pipel. Na i save mekim ol i kros tu.

Em i asua bilong Gavman stret. Tasol Gavman i kranki yet long painim ol ansa bilong pinisim ol trabel bilong Lo na Oda.

Dispela pasin Gavman i mekim long Hailans i givim tumas pawa long han bilong ol plisman. Mista Chan i tok, ol Lo yumi gat nau inap long pinisim ol trabel i save kamap long Hailans. Tasol dispela tingting Gavman i mekim i soim olsem, Gavman i no inap tru long

ranim kantri wantaim ol Lo yumi gat pinis.

Mista Chan i tok tu olsem, as bilong trabel em i no gat gutpela lida i gat klia tingting long stiaim kantri i go isi isi. Em i tokaut klia olsem, bikos ol i senisim ol minista bilong plis klostu klostu tumas, na dispela i paulim wok bilong Plis Fos. Long independens i kam inap nau, i bin i gat 5-pela minista bilong plis.

Mista Chan i tok, sapos tingting bilong hetman bilong kantri i no klia, em i mas pinis. Na narapela man husat i gat gutpela na klia tingting i mas kisim ples bilong em.

Provinsal Seketeri bilong Simbu Provins, Mista Burunke Kaman, i tok. Em i pret, nogut ol plisman bai i no ken yusim gut dispela pawa Gavman i givim long han bilong ol. Na tu em i tok, dispela pawa nau Gavman i givim long ol plisman i wanpela rot o we bilong daunim ol trabel bilong Lo na Oda inap long liklik taim tasol.

Na tu Provinsal Seketeri bilong Westen Hailans, Mista Patrick Geiyer i tok, Gavman i mas painim ol we bilong kisim gutpela ansa bilong stretim ol trabel bai gutpela taim i ken i stap oltaim.

Lida bilong Oposisen, Mista i go moa long pes 2.



Mista Julius Chan.



Tupela yangpela bilong lain ya 'Country Outcasts' i amamas danis. Ol lain ya em ol blakskin pipel bilong Australia yet. Ol mani ol i bin winim long pilai bai i go long helpim dispela pilai ol i kolim Saut Pasifik Ats Festival.

poto William Willando.



ASUA BILONG YUMI YET.

Okuk i tok tru, taim ol lain Simbu na Milen Be i bung.

Em i tok olsem, ansa bilong Lo na Oda i stap insait long yumi yet.

Tru, i gat planti as bilong ol trabel i save kamap. Olsem i no gat inap haus. No gat inap kaikai. No gat inap pe.

Na tu ol lo o pasin bilong Pablik Sevis na Gavman i no bilong yumi yet. Ol dispela i save pait long we bilong yumi na kamapim sampela trabel bilong Lo na Oda insait long kantri bilong yumi.

Tasol i tru yet. Bikpela as bilong Lo na Oda trabel i save kam long insait long tingting bilong yumi yet.

Pasin bilong daunim kros na belhat, pasin bilong daunim yu yet, pasin bilong stap isi, o pasin bilong tingim gut narapela manmeri. Ol dispela i mak bilong gutpela lo insait long tingting bilong yumi yet. Ol dispela i gutpela lo.

Na ating sapos ol dispela lo i bosim tingting bilong yumi gutpela taim i ken kamap.

Ating sampela trabel bilong Lo na Oda i ken go daun liklik.

Long wanem, pawa bilong kain tingting olsem i antap moa long pasin bilong lo.

Long wanem, pawa bilong kain tingting olsem i as bilong fri Gavman na fri pipel.



National weekly in Melanesian Pidgin

Editorial:
P.O. Box 1982
Boroko
Phone: 25 2500
Telex: NE 22213

Advertising:
In P.N.G.
Georgina Gaiger
Phone: 25 2500

Advertising:
In Australia
Media Sales Australia
Sydney
Phone: 436 1000

Subscription Rate:
Annual: K8.00

Strongpela lo long Yuni

Ben Skorpjo i raitim.

Yunivesiti bilong PNG long Mosbi i mekim pinis bikpela na strongpela lo long pinisim tru ol trabel i save kamap long Yunivesiti. Dispela long wanem insait long ol mun i go pinis i bin i gat planti trabel i kamap insait long Yunivesiti.

Bosman bilong Yunivesiti, Mista Renagi Lohia, i tok aut olsem long wik i go pinis. Mista Lohia i tok, sapos ol i painim wanpela sumatin i dring spak, o mekim nogut pasin long sumatin meri o man, na tu bagarapim samting bilong Yunivesiti em bai plis i kisim em. Na em bai kamap long kot.

Bipo i bin i gat tambu olsem ol plis i no inap go insait long Yunivesiti eria. Mista Lohia i tok planti sumatin i dring spak long wanem ol i ting dispela i soim ol i man tru. "Mi no laikim tru ol sumatin i save spak oltaim i stap long dispela Yunivesiti. Mobeta yupela i mas pinis long dispela Yunivesiti", em i tok.

Mista Lohia i toksave long ol sumatin olsem -

sumatin i brukim lo sapos ol i karim naip, akis, stik, let na ol botol. Ol samting olsem ol i ken yusim long pretim o bagarapim ol sumatin na ol samting long Yunivesiti eria.

Man i karim dispela samting raun, em plis i mas kisim em yet i go long kot. Mista Lohia i toksave long ol sumatin olsem. Wanem sumatin i mekim dispela ol samting em i brukim lo.

Na sapos Yunivesiti i painim em aut em bai raus long Yunivesiti inap plis na Yunivesiti Disiplin Komiti o lain bilong strongim ol rul i traim-em long kot.

Long mun Julai, Yunivesiti i pinisim 125 (wan handet en twenti faiv) sumatin long kos bilong ol. Em long wanem mak bilong ol i no kamap gut tumas.



Poto i soim Namba tu Praim Minista, Mista Ebia Olewale na Praim Minista bilong Solomon Ailans, Mista Peter Kenilora i orait long bihainim wanpela lo bilong kisim pis long biksolwara. Tupela i putim nem long pepa long Honiara long Saut Pasifik Forum miting long mun Julai. Poto Denis Fisk.



Mista lambakey Okuk.

i kam long pes 1.

Mista lambakey Okuk i tok. Gavman i no givim inap pawa long ol provinsal premia long pinisim ol trabel bilong Lo na Oda. Olsem yumi lukim nau, Premia bilong Is Nu Briten, Mista Koniel Alar. Em i wok long traim tasol long painim we bilong lukautim Lo na Oda long provins bilong em. Tasol nau Gavman i kalabusim em pinis.

Mista Okuk i tok tu olsem, dispela tingting bilong Gavman long salim ol bikpela lain plisman i go long Hailans i kirapim wanpela tingting nogut. Na tingting ya i olsem, mipela

nambis na yupela i bus.

Tasol ol arapela bikman bilong Hailans i amamas long dispela tingting bilong Gavman i mekim long hap bilong ol. Ol bikman olsem Wamp Wan, Minista bilong Helt long Westen Hailans Provinsal Gavman. Na narapela bikman kaunsila Kombra Kelye i amamas.

Mista Awap Rumints i tok, ol liklik lain tasol i save mekim ol trabel long Hailans. Olsem na em i tok, em i laikim dispela Lo Gavman i givim long han bilong ol plisman long pinisim ol trabel insait long ol Hailans provins.

Simbu na Milen Be Sekan

Julia Daia i raitim

Lida bilong Oposisen, Mista lambakey Okuk i tok, Lo na Oda i no mas stap long han bilong ol pipel. Olsem dispela samting nogut tru i bin kamap long Mande 30 Julai. Mista Okuk i bin mekim dispela toktok long samting olsem 200 (tu handet) pipel bilong Simbu long Boroko Is, long Trinde long Ogas 1.

Tasol i no longwe long ples ol Simbu i bung i stap, ol pipel bilong Milen Be tu i bung long soka graun, na wet long harim toktok bilong Mista Okuk na Mista John Noel, Minista bilong Bosim Ol Taun. Mista Noel i Mema bilong Kiriwina—Goodenough.

Tupela lain ya, ol Simbu na ol Milen Be pipel i bin bung long traim stret-im toktok long ol trabel i bin kamap long 29 de na 30 de long mun Julai.

Long 29 de long mun Julai, wanpela man bilong Milen Be i bin kilim wanpela Simbu i dai long naip. Na long Julai 30 long neks de, tupela man bilong Simbu i bin katim tupela man bilong Milen Be long tamiok. Em long bekim bek inda bilong wantok bilong ol. Wanpela i bin dai stret, tasol narapela i bin kisim bikpela bagarap tru, olsem na ol i bringim em long haus sik. Dispela trabel i bin kamap long samting olsem 2 klok stret



long apinun.

Long dispela miting, Mista Okuk i tok, yumi i mas respektim Lo na Oda Gavman i givim long yumi. Gavman i givim yumi sampela Lo pinis long bihainim. Olsem na Lo na Oda i no mas stap long han bilong ol pipel yet. Gavman i gat pawa long salim ol pipel husat i no bihainim Lo i go bek long ples bilong ol. Na tu em i tok, ol pipel i mas helpim ol plisman long lukautim Lo na Oda.

Mista Noel i bin stap insait long kibung bilong ol Simbu long dispela taim. Em i tok, ol pipel bilong

tupela lain wantaim i bin pret nogut tru. Olsem na no gat wanpela bilong ol i go raun long ol pablik ples olsem maket na stua.

Long taim ol i pinis toktok wantaim ol Simbu pipel, ol i salim 8-pela fida long go wantaim Mista Okuk na Mista Noel long soka graun, em ples we ol Milen Be pipel i bung i stap long en. Na long dispela taim, tupela lain ya i bin tok orait long bung long 10 Ogas, long Sarere long Boroko Maket long 10 klok stret. Na long dispela taim, bai ol i sekan. Na bai ol i pinisim tru dispela trabel o kros namel long ol hariap.

NIUS — NIUS — NIUS — NIUS — NIUS — NIUS —

☆ **NUPELA PREMIA** — Oro Provins i gat nupela Premia Man ya em Mista Mark Taua, bipo em i Spika bilong Oro Provinsal Asembli. Ol i bin ilektim em olsem Premia long miting, ol i bin holim long 30 Julai. Long dispela taim olpela Premia, Mista Edric Eupu i pinis long wok bilong em. Mista Taua i bin winim 11-pela vot, na i winim Mista Oswald Eanease. Oswald bin kisim 6-pela vot tasol.

☆ **RAUSIM PROVINSAL MEMBA** — Wanpela sumatin long Balob Tisa Koles i tokim Konstitusenel Komisnin olsem, ol i mas rausim olgeta sia bilong ol Provinsal Mema long Nesenel Palamen. Em long wanem, ol i save yusim planti mani tumas long baim ol, tasol ol i no save mekim wok bilong ol stret. Olgeta wok bilong ol Provinsal Mema em ol Open Ilektoret Mema tasol i ken wokim. Na dispela bai sotim namba bilong ol memba long Nesenel Palamen.

☆ **IS SEPIK ILEKSEN** — Komisina bilong Bosim Ol Ilekse, Mista James Mileng, i tok, ol de bilong putim nem long sanap long ileksen i stat long Fraide, Ogas 3, na i pas long 12 klok long Trinde 22 Ogas. Vot bai i stat long Sarere, 22 Septemba, na i pinis long 13 Oktoba. Na long 6 klok long apinun yet, bai ol i stat long kaunim ol vot.

☆ **LAE SITI ILEKSEN** — Komisina bilong Bosim Ol Ilekse, Mista James Mileng i tok. Lae Siti Kaunsil vot bai i stat long 24 Ogas na i pinis long 25 Ogas. Long dispela de long 6 klok apinun, bai ol i stat long kaunim olgeta vot.

☆ **WOKIM NUPELA BOT** — Wanpela lokal bisnis grup, ol i kolim Matla bilong Mussau Ailan, long hap bilong Nu Ailan Provins i bin wokim bot. Longpela bilong bot ya em i 14 fit na kos bilong em i K25,600 (twenti faiv tausen siks handet kina) olgeta. Sikspela memba bilong Malta Bisnis Grup yet i bin wokim dispela bot. Man i go pas long ol, em Mista Saesaria Siriki. Na krismas bilong em 58 yia. Ol i bin kirapim wok long dispela bot long stat long yia na pinisim bihain long 6-pela mun tasol. Matla Bisnis Grup yet i bin givim K11,600 (eleven tausen siks handet kina) na K14,000 (fotin tausen kina) i kam long Viles Ikonmik Fan.

☆ **SIR TEI ABAL** — Mema bilong Wabag, Sir Tei Abal i opim pinis nupela hap bilong PNG Benging Koporesen long Wabag long Julai 30. Pastaim beng i liklik tru. Tasol nau ol i ting beng bai go het gut tru long wok, long wanem, ol i gat moa spes.

**Ol Maborasa Jas.**

Dia Edita - Yes wantok, inap long yu givim mi liklik hap spes, na bai mi putim liklik wari bilong mi long Wantok Niuspepa. Yes, wari bilong mi i go olsem.

Long namba 4 de long mun Julai, long Sarere, mi bin ritim Wantok Niuspepa namba 275. Long dispela mi bin lukim pas bilong wantok ya, John Meiu. Em i bin toktok long ol jas bilong tumbuna singsing resis long Maborasa Festival.

Mi sapotim toktok bilong yu, yes em i tru. Mi tu mi bin stap insait long dispela bikpela de ol i kolim "Maborasa De". Mi lukim tru long ai bilong mi, na mi ting em i no stret. Mi lukim olsem; ol dispela lain jas i bilong Bilibil, na sampela ples i stap klostu long Madang taun tasol.

Ol i no kisim wanpela man bilong Bogia, Ramu na Saidor. Nogat. Ol i wokim "wantok sistem" stret. Yes, yupela ol dispela lain jas lukaut, maski mekim dispela kain pasin moa long bihain taim. Sapos yupela i mekim wantok sistem long neks yia, long 1980. Lukaut, bai yupela i kaikaim buai stret.

Madang taun em i no bilong yupela ol jas tasol. Harim gut na lukaut. Mipela i no wari long ol plisman, o kalabus. Nogat tru.

Em tasol, mi bilong ples Lalok long hap bilong Bugajim insait long Madang Provins. Nau mi stap wok aprintis long Lae. Tenkyu.

Wesly Mabb,
Lae/Morobe Provins.

Dia Edita - Mi gat wari, na mi laik yupela i givim mi liklik spes long mi autim wari bilong mi. Wari bilong-mi i go olsem.

Mi wanpela boi bilong Markham Haiwe, na nau mi skul long Yangpela Didiman Skul long Heldsback. Mi laik tok olsem, dispela skul i gutpela, tasol wanpela bikpela rong tru mi bin lukim long Ista Holide.

Mipela olgeta i bin go long holide, na long dispela taim mipela i bin tokim hetmasta olsem mipela i go long holide. Mipela i stap inap taim holide i pinis. Na taim mipela i laik kam bek, tumbuna bilong mi i bin dai. Olsem na olgeta boi i bin kam pas long skul, tasol mi bin kam bihain. Long wanem, mipela i bin planim tumbuna bilong mi.

Long taim mi kamap long hetmasta, em i askim mi long wanem as tru na mi kamap bihain tru. Na mi bin tokim em long olgeta stori long indai bilong tumbuna bilong mi. Na hetmasta i kirap na tok, em i no-gutpela ekskius. Olsem na em i givim mi panismen inap long 3-pela Sarere olgeta.

Mi wok long digim baret. Na mi ting mi gat gutpela ekskius. Tasol em i givim panismen long mi.

Em tasol, sapos yu husat brata o susa i laik sapotim mi, orait, rait tasol i go long Wantok Niuspepa. Tenkyu.

Alfred Markham,
Kaiapit/Morobe Provins.

Maski Krosim Memba Nating.

Dia Edita - Inap yu givim liklik spes long mitupela. Mitupela i bekim pas bilong wantok ya, Jack Palinau, i kamap long Wantok Nius long 14 Julai, 1979.

Em i tru long bipo yet long yia 1966 i kam inap 1970, i no gat wanpela samting i kamap long Tsak. Long dispela taim, mipela i gat wanpela Open Memba, em Mista Leme Ilyagalyo i stap long Palamen. Yu save long dispela taim, em i stap long Palamen na sindaun grisim ol man tasol long dring bia. Em i no mekim wanpela wok insait long Wapenamanda na Tsak.

Nau long yia 1972 i kam inap 1979, yu lukim planti samting i kamap long Wapenamanda na Tsak. Namba wan samting yu lukim, em yu lukim bikpela haus sik long Wapenamanda. I gat ples balus pinis, na tu i gat developmen i kamap long Wapenamanda yet. Na long Tsak eria, yu lukim i gat 4-pela komyuniti skul, edmin stesin na ketel fam o bulmakau fam.

Olsem na yu no ken krosim memba ya, Mista Pato Kakarya. Bilong wanem yu krosim em. Em asua bilong ol lida na ol kaunsila. Ol i no wok gut tumas long lukautim ol pipel bilong ol. Mitupela i stap insait long Tsak inap long wanpela yia, na mipela lukim olsem ol i save pait.

Olsem na mitupela i laik askim yu. Hamas tausent pipel i stap na pait? I gat 15,000 (fiftin tausent pipel) tasol, na em i no planti. Olsem na sapos yu laik kisim Memba bilong Tsak yet, orait yu tokim lida long ples. Na tu ol kaunsila long ples. Bai ol i ken stopim pait na sindaun gut. Na tu toktok gut wantaim ol pipel long ples.

Yu tok long kisim Memba bilong Tsak, orait mitupela i ken tokim yu we long kism memba. Em i olsem, sapos Tsak i gat wanpela koles, haiskul, 10-pela komyuniti skul, lokal gavman stesin na haus sik. Yumi i no gat ol dispela samting yet long Tsak. Sapos yumi gat ol dispela samting, orait yumi inap long kisim memba bilong yumi yet.

Em tasol long liklik hap

tok bilong mitupela. Husat manmeri i laik bekim, yu dring kol wara pastaim na rait i go long Wantok Niuspepa. Tenkyu.

Christopher K. Mamakin,
Luke K. Yakaemandani,
Badili/N. C. P.

Ol Viles Pipel Askim Gavman.

Dia Edita - Nem bilong mi, Lapa Yoka na mi bilong Borona viles, long hap bilong Sauten Hailans Provins. Nau mi laik askim wanpela kwesten i go long Gavman bilong yumi. Askim bilong mi i go olsem.

Mipela ol viles pipel i laik raun liklik i go long ol narapela kantri. Tasol mipela i no gat inap mani bilong baim balus. Mipela i laik go raun na lukluk long ol wok bisnis bilong ol narapela kantri i wokim long en.

Inap long Gavman i helpim sampela ol bisnis lida na salim ol i go na lukluk long ol bisnis ol narapela kantri i wok long en, o nogat?

Na narapela askim i go olsem. Mi no toktok long olgeta pipel bilong Papua Niugini. Nogat. Mi toktok long wanem ol man tru i kirapim bisnis long grup o wan wan bilong ol yet. Ol dispela kain man i laik i go na lukluk long ol narapela bisnis. Na bihain ol i ken kam bek na bihainim pasin bilong ol narapela kantri na mekim bisnis bilong ol i go het gut.

Na narapela askim i go olsem. Ol Gavman i ting, ol pipel bilong ples i samting nating. Nogat. Mi no ting, ol pipel bilong ples i samting nating tasol. Ol kain man o bisnismen long ples i kirapim kantri bilong yumi.

Ol i helpim long developmen kantri bilong yumi tu. Olsem na mi laikim bai Gavman i mas lukluk long dispela kain wari bilong ol pipel. Em tasol long liklik wari bilong ol pipel. Tenkyu.

Lapa Yoka,
Borona/S. H. P.

Lae Maket I Sting.

Dia Edita - Mi gat liklik

wari olsem na mi laik putim long Wantok Niuspepa. Sapos yupela i gat liklik spes long putim wari bilong mi long Wantok Niuspepa. Em nau, wari bilong mi i go olsem.

Insait long Lae Maket, mi save lukim Lae Siti Kaunsil, ol i save kotim ol man na meri long kaikai buai na i go insait long maket. Na olsem wanem long ol manmeri na pikinini husat i save mekim planti pipia insait long maket. Tasol Maket Kaunsil i no save kotim ol a?

Mobeta long Siti Kaunsil i mas putim wanpela pipia dram longwe long maket. Kaunsil i mas putim wanpela strongpela lo olsem, bai ol manmeri na pikinini i pret. Na olsem tasol, bai ol i no inap long tromoi pipia nating insait ausait long maket.

Em tasol long liklik wari bilong mi. Tenkyu.

Camillue K. Kamy,
Lae/Morobe Provins.

Watpo Ol Nes I No Werim Kep.

Dia Edita - Mi gat sampela belhat i save kamap, na nau mi raitim i kam. Sapos yu gat spes, inap yu prinim insait long Wantok Niuspepa. Ol belhat bilong mi i go olsem.

Mi bin raun nabaut long ol Hailans provins, na tu mi bin lukluk raun long sampela ol bikpela haus sik. Mi save lukim ol nes na sista i wok, tasol ol i no save werim waitpela kep bilong ol.

Long taim, mi lukim ol i wok i stap na i no gat kep. Mi save belhat tru long wanem, ol i bin lainim pinis long putim kep bilong ol long taim ol i wok. Tasol i luk olsem, ol nes na sista i laik bihainim laik bilong ol yet.

Em i no stret, man lukim ol ami, ol plisman, ol woda plis na ol nevi. Ol-taim ol i save putim kep na mekim wok bilong ol. Em bikos, ol i save wok long Gavman na sevim kantri bilong yumi. Tasol olsem wanem long ol nes na sista? Ol i no save putim kep na mekim wok bilong ol.

R. Takangem Saka,

Wok bisnis long ol bataplai



I gat wanpela man long Kerowagi long Simbu, nem bilong em Martin Kunma. Ol i kolim em wanpela bataplai fama. Em i bikos em i save groim ol bataplai. Watpo em i mekim olsem? Long wanem em i salim ol naispela bataplai na i winim gutpela mani long dispela kain bisnis. Frank Mihalic i raitim



Martin sanap wantaim ol bataplai bilong em.

Sapos yu go lukim liklik opis bilong Martin, bai yu ken painim olkain piksa bilong ol kain bataplai i bilasim olgeta banis bilong em. Na long tebol bai yu lukim planti liklik skin pas i stap. Ol wan wan skin pas i gat wanpela smolpela bataplai insait long en, o wanpela spesel kain binatang. Ol skulmanki i save painim na bringim i kam, na Martin i save baim sapos ol i gutpela. Man i ken winim inap wan kina long wanpela smolpela naispela bataplai.

Tasol Martin i no save bungim ol bataplai tasol. Nogat. Em i save kamapim na groim ol tu. Lo bilong bataplai i olsem: Pikinini bilong bataplai - em i luk olsem wanpela binatang - em i save kaikai lip bilong wanpela kain tri tasol. Kain kain bataplai i laikim kain kain tri. Orait, Martin i save pinis long dispela, olsem na em i plantim ol

dispela kain spesel tri nabaut long haus bilong em. Na ol kain kain bataplai i save kam, painim tri na lip bilong em stret, na em i putim kiau aninit long ol lip. Dispela em i smatpela pasin, long wanem, taim binatang bilong bataplai i kamap long kiau, wantu em i stap pinis long kain lip em i laik kaikai. Em i no mas wokabaut painim kaikai. Kaikai i stap pinis.

Orait, inap long tri wik samting, dispela binatang i wok long kaikai tasol. Nau em i gro bikipela na fãtpela na em i stat long wokim wanpela haus bilong em. Em i wokim olsem wanpela kain blanket bilong pepa na i karamapim em yet long en. Em i wokim sampela string bilong hangamapim haus long han diwai o aninit long lip. Orait, nau em i go insait long haus na samapim dua na, nau em i slip tasol i

stap long tudak.

Bihain long tripela wik zen, dispela binatang i tanim long naispela bataplai. Em i lusim haus bilong em na i kam ausait na i flai.

Martin i gat wanpela liklik kalabus waia. Na insait long en, em i hangamapim nabaut ol dispela haus bilong binatang bataplai em i save painim nabaut long ol lip. Bihain ol i op pinis, ol nupela bataplai i plai nabaut na mekim drai nupela wing bilong ol. Nau Martin i kisim wan wan na i kilim na i mekim redi bilong salim i go long ol kampani i save baim bataplai.

Taim bataplai i kamap long haus bilong em, em i bikipela pinis. Em i no save gro moa. Em i raun tasol na i painim kaikai insait long ol plaua. Em i mekim olsem inap long sampela mun.

Long PNG yumi gat sampela kain bataplai ol i no ken painim long ol narapela kantri. Olsem na gavman i bin tambuim ol man long holimpasim ol dispela kain spesel bataplai. Na tu i tambu long salim ol i go long ol ausait kantri. Ol man bilong kastam ol i lukaut long dispela lo.

Long Bulolo i gat wanpela dipatmen bilong gavman i bosim ol dispela wok bataplai long PNG. Man i gat gutpela save long groim ol bataplai, olsem Martin i gat, em i save kisim spesel laisens bilong mekim dispela kain wok. Em tu i kisim orait long salim ol bataplai i goaut long ol arapela kantri.


Martin i lainim we dispela wok bataplai? Tude em i wok long stesin bilong Katolik Misin long Kerowagi. Pater Voss i bin kisim em pastaim long helpim em long wokim haus na mekim wok kamda samting. Long wanem, bipo Martin i bin skul long dispela wok long bikipela teknikal skul long Lae.

Pater Voss yet i bin mekim dispela wok bataplai olsem wanpela wok pilai tasol. Na em i bin winim planti mani liklik long en. Na tu em i bin painim planti pipel long Yurop na Amerika i laikim tumas long baim ol bataplai. I gat sampela kampani tu i save baim. Olgeta de Martin i bin glasim gut dispela wok bilong Pater Voss na em i hat long lainim. Orait, Pater i skulim em.

Bihain long independens i kamap, gavman i wokim wanpela lo i tambuim ol ausait man long ranim bisnis bataplai. Orait, Pater Voss i putim dispela bisnis olgeta long han bilong Martin. Em i samting bilong em nau, na i gutpela pasin tru bilong painim mani.



Ol haus bilong ol bataplai.



PHANTOM COMICS

YU KEN BAIM LONG
STUA LONG OL-
GETA FOTNAIT.

Kas bilong Phantom

MISTA TOKSAVE LONG.. OL SPANA NA WOK

BILONG OL

Ian Donald i raitim.



Lesen 19



Ring Spana

Ol mekenik i save yusim planti taim dispela kain spana. Ol i no save bagarapim nat o skru. Na bikos handel bilong ol i krungut, ol i gutpela long mekim wok long hap i no gat planti spes.

Soket Spana

Mekenik i no save baim wanpela dispela spana tasol. Nogat. Em i save baim lain soket spana. Na i gat wanpela handel tasol i pas long ol wan spana. Dispela kain lain spana i tudia tru.

OL SPANA

I gat faipela kain spana na ol isave wokim narakain wok. Wanpela spana emi no inap wokim wok bilong olgeta kain spana. Mobeta yu kam na toktok wantaim ol stuaman long Steamships Masinery na em i ken givim yu spana i pas long wok bilong yu.

Ol stuaman long Steamships Masinery i gat save moa long ol spana na ol tul bilong wokman.



MACHINERY NA HARDWARE

**PORT MORESBY . GOROKA . LAE . KIETA . MADANG POPONDETTA .
RABAU . KUNDIAWA . MT HAGEN SAMARAI . VANIMO**



HEBAMO 025



Hia yu ken ritim tingting bilong ol sampela meri long ol kainkain samting i kamap pinis long PNG

Julia Daia i rattim

Misis Kesia Beaga, em i wanpela meri husat i no save toktok planti tumas. Em i save oltaim mekim gutpela toktok tasol. Em i no meri nating tasol. Nogat. Em i wanpela meri i gat strongpela na gutpela tingting. Olsem na nau, em i kamap namba wan Papua Niugini meri long statim Bisnis bilong Lukautim Tit.

Misis Beaga i gat 31 krismas. Na em i bilong Vunavatik viles, long hap bilong Rabaul. Man bilong em, Martin Beaga, em i bilong Noten Provins. Martin i save wok olsem wanpela taun plena wantaim Dipatmen Bilong Bosim ol Taun.

Tupela i gat 3-pela pikinini olgeta. Misis Beaga yet, em i wanpela meri bilong wok hat tru. Em long wanem, em i gat Bisnis Haus bilong Lukautim Tit. Na dispela bisnis bilong em i winim wan yia pinis. Tasol nau, em i laik autim sampela tingting bilong em long kantri bilong yumi.

Ol dispela wok bilong Misis Beaga i no save pasim em long tingting long kantri bilong yumi. Nogat. Olsem na nau, em i laik autim sampela gutpela tingting bilong em long yumi.

Planti pipel long ol taun i save painim hat tru long bung na toktok wantaim ol narapela pipel insait long taun yet. Olsem na planti taim, bai yu lukim olsem haus bilong tupela

meri i stap klostu wantaim. Tasol tupela meri i no save bung na toktok wantaim.

Em long wanem, wanpela meri i ting olsem, nogut narapela meri ya i gat sampela wok bilong mekim. Na tu sapos em i go, nogut bai em i pasim narapela meri ya long wok bilong em. Long dispela tasol, ol pipel i no save long tingting bilong ol narapela pipel.

Tasol long as ples stret no gat. Olgeta pipel i save stap fri tasol long wokabaut i go i kam na sindaun toktok wantaim. Na tu ol i no save wari tumas.

Wanpela bikpela samting i save oltaim pasim ol pipel long i go i kam long taun. Em ol pipel i save pret

long ol raskol tasol. Na dispela em i wanpela bikpela wari long ol meri.

Olsem na nau, Misis Beaga i givim yumi wanpela ansa bilong pinisim dispela wari long ol raskol. Dispela ansa i olsem, ol mama i mas skulim gut ol pikinini long pasin bilong lukautim ol yet long taim ol i liklik yet.

Dispela skul bai i helpim ol pikinini long i no ken askim ol papamama long olgeta samting. Em long wanem, sapos ol papa mama i givim olgeta samting long ol pikinini. Em bai givim tingting nogut long ol. Na em hia eksampel: Ol lain pikinini ya bai tingting olsem, ol i antap moa yet long ol narapela lain pikinini.

Na narapela eksampel i



Misis Kesia Beaga.

olsem: Sampela lain pikinini i save raun na kisim ol emti botol na salim ol. Long dispela tasol, Misis

na salim. Na olsem tasol, ol pikinini bilong em i save kisim poket mani bilong ol yet.

Beaga i tok, em i save tokim ol pikinini bilong em yet long bungim ol botol



TARO, MIT NA KARI.

Ol Samting yu mas i gat:

Tupela taro kon kon
Wanpela tin mit
Wanpela anian
Wanpela tomato
Wanpela liklik spun kari pauda.
Tupela banana i mau pinis
Tupela bikpela spun bata
Liklik sol

We long wokim:

Wasim na rausim skin bilong taro. Katim liklik liklik. Boilim insait long sospen.

Wasim anian na tomato. Katim liklik liklik. Katim mit i go liklik liklik.

Hatim bata insait long narapela sospen na kukim ol anian, tomato na mit wantaim.

Tanim kari paura na sol i go wantaim ol. Miksim liklik wara i go insait long sospen wantaim. Na katim banana i go liklik liklik.

We bilong sutim kaikai:

Putim taro antap long plet na kapsaitim mit sos i go antap long ol taro. Putim ol liklik liklik banana antap long en.

SINGER



**PREN BILONG YU
INAP OITAIM**

Salter skel

.... makim stret
hevi bilong
olgeta samting.

Olgeta skel bilong makim hevi bilong kopi, koko, kopra, tea na olgeta samting olsem i mas carim mak long pes bilong em. Dispela mak emi mak bilong Gavmn long Opis long Wet na Mesa. Sapos skel i no gat dispela mak yu i no nap usim olsem wanem dispela mak emi mak bilong inspekta na i tok olsem skel i tok tru.

Sais long dispela skel yu usim i mas kamap long 10 ins. Sapos emi liklik long 10 ins i no kisim orait long Gavman.

Bikpela Salter Skel i kisim orait long Gavman na yu inap baim long olgeta hap Steamships Machinery long Papua New Guinea.

**Yu askim long Salter Skel.....
bai em i makim stret !**



MACHINERY NA HARDWARE

**PORT MORESBY . GOROKA . LAE . KIETA . MADANG . POPONDETTA
RABAU . KUNDIAWA . MT HAGEN . SAMARAI . VANIMO**

HEBAMO 021

EVINRUDE

NAMBAWAN AUTOBOTO MOTO

6H.P 15H.P 25H.P 35H.P

PLANTI SPEA PAT I STAP

PRAIS I DAUNBILO NAU

BAIM TUDE LONG

BOROKO MOTORS

And Subdealers




Gras bai lait moa..Loxene




Taim yu laik wasim gras bilong yu, yu no ken kisim smel sop. Nogat. Kisim Loxene. Loxene i go. Sori. Gras bilong yu i smat moa, bai i lait tru. Yu ken wasim long hat o kol wara. Wasim gras bilong pikinini long Loxene bai isi tru long rausim laus. Taim yu laik baim sop wara bilong wasim gras baim Loxene tasol.



YU KEN KISIM LONG OLGETA STUA NA TRETSTUA.



SIKS MAIL SETELMEN PAINIM HAT LONG KISIM WARA



Kumalau Tawali i raitim

William Willlando kisim poto



Wanpela Lida long Kem, Mista Maima Kaupa bilong Kundia-wa.

Long olgeta moning, ol man i stap klostu long Siks Mail Rabis Damp, i save kwapim maunten wantaim liklik tin long kisim wara. Ol i save go long Mosbi Haikul long kisim wara. Na skul ya i olsem 2 mail longwe long setelmen bilong ol.

Sampela taim, ol tap wara i pas. Olsem na ol i save go long narapela hap na kisim wara. Em i no isi tumas long painim na kisim wara nating long bikpela taun olsem Mosbi.

Wara ya ol pipel i save kisim em inap tasol bilong kukim kaikai na dring. Olsem na tarangu, ol pipel ya i no save was was. Em long wanem, ol i no gat inap wara long was was gut.

Long taim bilong ren, ol i save kisim ol dram no-gut long ples bilong tromoi

pipia na pulimapim wara bilong dring. Dispela wara ol i kisim em i no gutpela

bilong dring. Tasol tarangu, ol i save mekim nating. Bikos i no gat we, bai ol i mekim wanem?

I gat samting olsem 2,000 (tu tausen) pipel i stap long dispela Setelmen. Olsem na wanpela bikpela samting ol i mas i gat, em wara tasol. Em bikos, wara em i namba wan samting tru long laip.

Wanpela bilong ol lida long dispela setelmen, em Maima Kaupa. Em i wanpela yangpela man tru. Em i bin stap long dispela setelmen inap long 3-pela yia pinis. Na em hia tok-bilong em.

Kaupa i tok, ol pipel i no save was was, olsem na ol i save sem long go raun long taun. Em long wanem, ol i ting nogut ol man i smelim ol na tok olsem. Olanan, ol pipel ya i sting nogut tru.

Planti bilong ol pipel i stap long dispela setelmen, i bilong Gumine, long hap bilong Simbu Provins. Ol pipel i tok, bai ol i no inap long go bek long ples. Em long wanem, Simbu i gat planti manmeri pinis. Na tu sapos ol i go bek, bai ol i no gat ples bilong sindaun wantaim famili bi-tok ol.

Nau tasol bihain long 18 yia i go pinis, ol i kisim helpim long wara. Em bikos, Mosbi Komyuniti Developmen Grup, i tok-tok strong wantaim ol papa bilong graun inap long 7-pela yia olgeta.

Tokman bilong Komyuniti Developmen Grup ya, Mista Semese Sea i tok. Ol pipel yet i bin mekim bikpela hatwok tu. Past-taim long ol i larim ol pipel i kisim ol tang wara, papa bilong graun i bin askim ol long baim graun. Olsem na long Februeri long dispela yia yet, ol pipel i bin givim K1,000

(wan tausen kina) long papa bilong graun na baim graun.

Sapos husat man i gat gutpela tingting. Bai em inap givim bikpela tok tenkyu i go long Mosbi Komyuniti Developmen Grup long helpim bilong ol. Na tu long ol pipel bilong setelmen yet. Em bikos, tarangu ol i bungim mani long liklik pe ol i save kisim long fotnait. Na long dispela tasol, ol i baim rot bilong kisim wara i go long setelmen.

Planti taim, yumi save tok nogutim ol kampani.


tasol ol kampani tu i mekim gutpela pasin. Em bikos, ol kampani i save helpim ol pipel tu. Foapela bikpela kampani long Mosbi, i bin givim tupela tang wara na samting bilong sanapim ol tang long ol pipel. Ol lain kampani ya, em Burns Philp, Hornibrooks, Ready Mix na Barlowe Industries.

Kampani ya, Barlowe Industries tasol i bin givim dispela tupela tang wara long ol pipel long Siks Mail Setelmen.

Gavman bilong yumi i save lusim planti mani long baim ol bikpela ka olsem

Mercedes. Na tu long holido o raun nabaut tasol i go long ol ovasis kantri. Tasol Gavman i no save yusim mani long helpim ol tarangu pipel liklik. Nogat tru. Tarangu, sampela bilong ol pipel i save stap long ol ples i gutpela tasol long ol enimal i ken sindaun long en.


Bikman ya em Baluo Nebabo.



Ol pikinini i amamas was was long wara klostu long haus.

Mi laik lusim meri

LAIP



LAIN

Dia Laiplain,

Marit bilong mi i bagarap pinis na mi bel nogut tru. Mi ting mobeta mi katim marit bilong mi. Mitupela i marit inap 7-pela yia nau na mitupela i gat 3-pela pikinini. Mi na meri bilong mi, mitupela i kros planti taim moa na samtaim mitupela i pait. Dispela i kamap taim mitupela i lusim ples na i kamap long taun. Mi laik bai 3-pela pikinini i mas stap wantaim mi, na mi laik kisim bek pe bilong meri. Mi no save long pasin bilong katim marit long ai bilong lo. Inap long yu ken tokim mi, mi mas mekim wanem samting?

Dia Pren,

Mipela i sori long painim olsem: yu na meri bilong yu i bin painim planti hevi bihain long yutupela i bin kam sindaun long taun. Na tu yu tok yu laik katim marit. Tasol mipela i ting, dispela kain samting i

no inap long mekim yu hepi. Planti taim ol marit i katim marit, na ol i no bel gut. Na ol pikinini bilong tupela i painim taim nogut. Olsem, dispela laik bilong katim marit, em i bikpela samting. Mobeta yu tingting gut long en pastaim.

Yutupela i bin kamap long taun na lusim ples – dispela samting i save bringim planti nupela wari na hevi long olgeta famili. Na tu i no gat ol wanfamili na ol pren na kandere i sambai long helpim yu, olsem long ples. Ol i stap longwe nau. Na tu i no gat ol bratasusa inap long mekim kol bel bilong yu na meri, na olsem yutupela i save pait nau.

I gutpela sapos yutupela i ken go toktok wantaim man o meri i tren pinis long stretim wari bilong ol arapela pipel na bilong ol marit. Planti taim dispela kain man o meri i save painim sampela we na soim nupela rot bilong stretim trabel bilong yutu-

pela. Yu ken toktok wantaim wanpela sosal woka o wanpela pris o wanpela pasto o wanpela opisa bilong sios bilong yu.


Sapos yu bin traim olgeta samting pinis, tasol yu strong yet long katim marit, yu ken mekim dispela tasol long ai bilong lo. Sapos yu marit long ai bilong lo na i kisim setifiket bilong marit, orait, yu mas rait i go long Public Solicitor, P. O. Box 3661, Port Moresby. O ring long 25 8866. Em bai skulim yu long ol lo bilong kantri. Na em tu bai i tokim yu sapos ol pikinini inap long stap wantaim yu o wantaim meri.

Sapos marit bilong yu tupela em i marit bilong ples na marit bilong pasin tumbuna tasol, orait, ol pasin bilong ples na lain bilong yu tupela tasol inap long katim dispela marit.

Sapos yu na meri i bilong wanpela ples tasol, yu mas sindaun toktok wantaim papamama bilong meri na tu wantaim ol brata bilong yu na wantaim ol bikman bilong ples. Sapos yu na meri i bilong narapela ples, ples i longwe, nau em i hatwok long stretim tok long bekim pe bilong meri. Bikpela samting, em i long yutupela i sindaun toktok wantaim ol wanfamili, bai ol i harim gut trabel bilong yutupela na i skelim. Planti taim moa ol yet inap stretim wari.

Sapos yu marit long sios, wari bilong yu i nara-

kain gen. Planti Kristen sios i bihainim lo bilong Nupela Testamen i tok, i no gat wanpela man inap long brukim marit. Em samting bilong God.




PE BILONG KAKAO – KOPRA – KOPI.

KAKAO – K1,690 long wan tan.

KOPRA – Hot Air (Grin) – K337 long wan tan.
F.M.S. (Blak) – K334 long wan tan.
Smok (Ret) – K332 long wan tan.
Long Namatanai na Buka pe i daunbilo liklik.

KOPI – Y Gred K2.00 inap K2.03 long wan kilo.
X Gred K2.05 inap K2.08 long wan kilo.
A Gred K2.09 inap K2.18 long wan kilo.
Robusta K1.91 inap K2.00 long wan kilo.
Pe bai yu kisim long ol wan wan taun.
Kainantu – K1.28 inap K1.39.
Goroka – K1.30 inap K1.38.
Kundiawa – K1.30 tasol.
Minj/Banz – K1.32 inap K1.43.
Mount Hagen – K1.32 inap K1.48.
Wewak – Robusta – K1.00 tasol.
Lae – Arabica – K1.05 inap K1.15.
Robusta – 85 toea inap K1.10.
Wapenamanda – K1.21 tasol.
Mumeng – Robusta – nogat olgeta.
Madang – Arabica – K1.30 tasol.
Robusta – K1.30 tasol.



**SAYS KON MIT LOF
i gutpela long yu!**

**SAYS KON MIT LOF
i gutpela kai kai tu!**



SAYS CORNED MEAT LOAF

GSHS 02

Yumi Olgeta I Laik Smel Nais Na Smel Klin


Spray Fresh Em I Wanpela Kain Smelpaura I Save Tekewe Hariap Ol Smel Ncgut Bilong Bodi. Na Em I Wok I Stap Longtaim Moa.

I Gat Tupela Kain Spray Fresh Na Tupela Wantaim I Bilong Olgeta Memba Bilong Famili.

Yu Go Baim Sampela Spray Fresh Long Tretstua O Long Bikpela Supamaketa Yu Ken Painim Long Wanpela Yelopela O Blupela Tin.

Olgeta Memba Bilong Famili Bilong Yu I Ken Yusim....Na Bai Ol I Smel Nais Na Klin.

Yu Go Baim Sampela Spray Fresh Long Tretstua O Long Bikpela Supamaketa Long Taun



LUKIM MANI KAMAP BIKPELA

- Long Pas Buk Bilong Yu
- Long Mani Yu Putim Long Beng

Mipela was gut long moni bilong yu **Wales**



**Bank of New South Wales
(PNG) Ltd.**



TOK SAVE

INDEPENDEN STET BILONG PAPUA NIUGINI

LAE SITI KAUNSIJ JENEREL ILEKSEN, 1979.

Toksave i go long ol pipel na ol man bilong vot husat i stap long Lae Siti Kaunsi Eria. Opis bilong putim nem long Kaunsi Jenerel Ilekse, bai i pas long 12 klok apimun, long 27 Julai, 1979. Ol nem i stap daunbilo, em ol man ol pipel i ilektim pinis long resis long dispela resis long dispela ilekse. Bai nem bilong ol i stap wankain olsem long Pepa Bilong Vot.

WOD WAN

1. Mitaharo Tava
2. Kabi Mande
3. Rob Roy Keura
4. John Wia

WOD TU

1. Manase Botieng
2. Sam Soro Kairu
3. Dennis Branney
4. Conrad Tali
5. Robin Maira
6. Mark Isom
7. David Hulape
8. Kalapa John
9. Silas Gawi
10. Apolo Siling

WOD TRI

1. Phillip Posanau
2. Henry Warkia
3. Seka Ia'Baita
4. Jim Seeto
5. Pokatou P. Pomaleu
6. Namon T. Mawasong
7. Alex O. Efi

WOD FOA

1. Kepon Tumbi
2. Salasie Dunusu
3. George P. Mack
4. A. Daku Naho
5. Royden J. Aigal

WOD SIKS

1. Lokora Kaveapo
2. Timothy Pohai
3. Peter Yall
4. Mactuawa Stafford (Misis)
5. Sarufa John

WOD SEVEN

1. Gisung Samuel
2. Gias Umbu
3. John Tipu

WOD ET

1. Zotnoi Wokino
2. Tonny Tingena
3. Guma Way
4. Raphael Bige
5. Boihi Sima
6. Pama Anio
7. Matthew Paglau
8. Jack Talui
9. Mulin Pimbin
10. John Kumo
11. Yangoi Towa
12. Okuko Nicholas
13. Peter Kuania
14. Ami Andrew
15. Lewong Legi
16. Nain Kimbi
17. Tom Wanzu

WOD NAIN

1. Martin Aigilo
2. Eli Umo
3. Jimmy Yawa
4. John Pomoh Kombuou

WOD TEN

1. Gabriel Dekwalen
2. John Rogers
3. Richard J. Moaitz
4. Ralph C. Phillips
5. Maurice J. Sullivan
6. Roy E. Pogat

WOD ELEVEN

1. Adam B. Munana
2. Benny Lohing
3. Paul Mal
4. Mai Kem
5. Jack Dinogo
6. Tom Owa
7. James Enonga
8. Jack Ase
9. David B. Omba

Handwritten signature

M. KONE
RETURNING OFFICER

30th July, 1979.

OL PAS



Maski Putim Nes Yunifom Nating.

Dia Eedita - Inap long yu prinin wanpela bikpela wari bilong mipela ol nes long Maprik Haus Sik, long hap bilong Is Sepik Provins. Wari bilong mipela i go olsm.

Wanpela ted (3) yia nes long Boram Haus Sik long Wewak, i bin mekim wanpela pasin nogut long meri bilong dokta bilong mipela long Maprik. Na mipela i no amamas tumas long dispela pasin.

Meri bilong dokta i bin go daun long Boram Haus Sik long Wewak long karim pikinini. Na dispela ted yia nes i lukim na i tok olsem long em. Em i tokim meri bilong dokta, yu go long aut pesen, na taim em i go long aut pesen. Ol man i wok long hap i tok o sori tru.

Na bihain ted yia nes ya i lukim meri bilong dokta na tok, o sori mi ting yu wanpela sikmeri nating. Olsem na tarangu i kam bek gen long Maprik Haus Sik, na mipela ol nes hia wantaim man bilong em dokta i wok na helpim em long karim pikinini.

Susa, maski yu ted yia nes, yu mas askim pastaim. Mobeta yu no ken putim kep o hat ya i gat 3-pela mak long en. Em i no samting bilong bilas tasol na wokabaut i go i kam nating long haus sik.

Mipela ol nes long Maprik i gat planti toktok tru. Tasol mipela i sotim toktok liklik, long wanem mipela i ting em inap olsem. Tasol dispela ted yia nes husat i bin mekim dispela kain pasin i mas sem long em yet.

Sapos yu husat i gat wari, traim long bekim i go

long Wantok Niuspepa. Mipela i gat planti toktok i stap long autim long yu. Tenkyu.

Training Nursing Aids,
Maprik Hospital/E.S.P.

Maski Givim Wok Long Meri Tasol.

Dia Eedita - Plis inap yu givim mi hap spes na mi laik sapotim Mista Dema Ngesi long Heldsbach Pri Seminari long Finschhafen. Yes wantok, tok bilong yu i tru. Em long wanem, long sampela hap, ol meri i save wok hat tru.

Mista Ngesi, mi sapotim yu long wanem, toktok bilong yu i tru. Mi bin raun long olgeta hap long Papua Niugini pinis. Na mi lukim long sampela ples, ol man i go painim pis. Na sampela taim, ol i save go nating long stesin.

Dispela kain pasin i no stret tumas. Yumi wanem kain man tru? Yumi wanem, king bilong kantri, o bikpela lida bilong ples. Olan, yumi mas traim na karim hevi wantaim. Em i no gutpela long givim bikpela hevi long ol meri oltaim.

Ol hevi bilong famili em man na meri i mas karim wantaim. Na ol man i no mas givim olgeta hevi long ol meri tasol. Nogat. Yutupela wantaim i mas karim hevi wantaim.


Long ples bilong mi long Galp Provins, ol man na meri i save wok wantaim long gaden. Sampela taim, ol man yet i save go long gaden, na taim em i pinis wok, em i mas kisim buai, daka na kaikai long gaden i kam long ples.

Na olsem tasol long ol meri tu, taim em i pinis wok insait long haus. Em i mas go painim pis o kisim paiawut bilong kukim kaikai. Dispela gutpela pasin i stap yet insait long Galp Provins.


Yumi ol man i mas lukautim gut meri. Em tasol long liklik toktok bilong mi. Sapos husat man i laik bekim o sapotim mi, rait tasol i go long Wantok Niuspepa. Tenkyu.

Jesse John,
Gerehu/ N.C.P.


Mekim kaikai bilong famili i swit moa.



Putim liklik HOLBROKS KARI PAURA long kaikai bilong yu.




Tanim wantaim kaikai.



HOLBROKS KARI PAURA – yu ken taim long 20t long ol stua.



Ol famili bai amamas tru. Traim na save.



SSB/RCE/BOCP

Dettol i Lukautim Gut Famili Bilong Yu



Sapos pikinini i katim han o skrapim o kukim, o sapos binatang i kaikalm, maski, putim Dettol tasol na bai no gat sua i kamap.



Dettol i gutpela marasin bilong klinim sua na kilim ol jem. Putim wan spun Dettol insait long wanpela glas wara na klinim sua wantaim hap kapok. Nau karamapim long klinpela banis.



Dettol i strong, i kilim ol jem.



Yu ken putim liklik Dettol insait long wara wantaim sop bilong wasim pikinini. Yu ken wasim ol laplap bilong em tu wantaim tupe-la spun Dettol.



Sapos yu laikim toilet na haus kuk i kamap klin na i gat gutpela smel, orait, tanim tupela spun Dettol wantaim wanpela dis wara, na wasim ol samting. Em tasol.

Baim Dettol nau long bikpela stua o long stret stua.

OL PAS



No Pasim Ol Liklik Ples Balus.

Dia Edita - Plis sapos i gat liklik spes i stap inap yupela i ken putim dispela liklik tok bilong mi.

Yes mi laik bekim pas bilong wantok ya, T.K. Numo Paiku, bilong Amanab, Wes Sepik.

Brata ol tok bilong yu i tru. Mi tu mi ting olsem. Dispela Mista Wingti em i tingting long em yet na em i laik putim dispela lo long pasim ol liklik ples balus insait long bus.

Em i no stret long dispela pasin o lo em i putim. Em i no save long ol arapela brata i stap insait long bus. Bai ol i kam long taun olsem wanem?

Sapos ol man i gat wok olsem, wok tisa o wok long opis, o long stua o mekim sampela wok insait long taun, bai ol i kam olsem wanem na mekim ol dispela kain wok insait long taun? Plis traim na tingim dispela. Maski long tingim yu yet.

Em tasol liklik wari bilong mi. Tenk yu.

James Yowanin,
Anggunak/ Wes Sepik.

Was Was Gut Na Tok Bilas.

Dia Edita - Plis inap yu givim mi liklik spes, na bai mi autim liklik wari long Wantok Niuspepa. Yes, mi wanpela man long hap bilong Bougainville, na mi save wok long Kapa Mains long Panguna. Na wari bilong mi i go olsem.

Planti taim, mi harim long redio ol i toktok olsem, ol pipel bilong Bougainville i laik rausim ol Hailans manmeri husat i stap long Not Solomons.

Em long wanem, ol Hailans manmeri tasol i save raskal nabaut. Ol i save brukim stua, na stilim kai-kai bilong ol lokal pipel na kilim indai man tu.

Mi ting dispela kain toktok long sutim tok i go long ol Hailans i no stret. Dispela kain toktok em mipela ol pipel bilong Bougainville yet i wokim, na mipela i sutim tok i go long ol Hailans tasol. Planti taim mi lukim long ai bilong mi, ol pipel bilong Bougainville i kisim nating ol samting insait long ol stua.

Na sampela taim, ol sikiuriti gad bilong ol stua i save holimpasim ol na kisim ol i go long kot. Sampela taim, ol pipel bilong Bougainville long hap bilong Kieta i go na kilim indai wanpela man bilong Madang. Na bihain gen, ol lain long hap bilong Kem 5 long Pangia i kilim indai wanpela man bilong Enga.

Planti bilong mipela long Bougainville i save mekim kain kain pasin nogut tru. Na mipela i save tok, mipela i gutpela man, na ol Hailans tasol i no gutpela man. Dispela tok i no stret na gutpela tumas. Sapos mipela ol pipel bilong Bougainville i no mekim pasin nogut, em i orait long mipela i sutim tok long ol Hailans.

Mipela ol pipel bilong Bougainville i mas was gut, na mipela i no ken tok baksait o tok nogut long ai bilong kain kain man. Em tasol, na yuhusat manmeri long hap bilong Bougainville i laik bekim pas bilong mi. Rait tasol i go long Wantok Niuspepa. Tenkyu.

L. Takeru,
Panguna/N. S. P.

Maski Tok Yesa Nogut Yu Wari Gen.

Dia Edita - Mi laik bekim pas bilong Piu Tobias bilong Kundiawa, long hap bilong Simbu Provins.

Yes, long Wantok Nius namba 272 bilong 23 Jun, 1979, yu bin rait na tok. Gavman i mas givim gan o masket long ol Hailans Haiwe draiva. Yes Tobias, mi amamas tru long gut-

pela pas bilong yu. Tasol mi laik askim yu gen.

Olsem wanem? Yu bin tok pinis olsem, yu laikim tru bai Gavman i tok orait long ol Hailans Haiwe draiva i kisim gan o masket. Olsem tasol bai ol i ken sutim ol stilman na i dai. Na sapos ol i sutim wanpela man long lain bilong yu, bai yu mekim wanem? Bai yu no inap long krai, o karim banara, spia na tamiok. Na yu raun i go long haiwe na was long bekim indai bilong wantok bilong yu a?

Pren, dispela pas bilong yu, mi lukim na mi laik tok olsem. Yu wanpela bulsit man tru. Yu ting sapos wanpela Hailans

Haiwe draiva bilong Morobe Provins i sutim wanpela stilman bilong Simbu long gan o masket, na bai olsem wanem? Bai yu amamas o nogat? Pren, mi ting olsem, nogut yu karim tamiok na banara. Na yu kirap ranim ol Morobe man long Kundiawa i go bek long Lae.

Pren mi ken tok olsem, ating yu spak na yu raitim dispela pas. Sapos yu laik rait pas long Wantok Niuspepa. Yu mas traim na tingting gut. Bikos Wantok Niuspepa em i bilong Papua Niugini.

Em tasol, sapos yu laik bekim, orait mi wet tasol long baim Wantok Niuspepa na ritim pas bilong


yu. Tenkyu.

D. Basuk,
Lae/Morobe Provins.



Salim ol pas i kam long:
WANTOK
BOX 1982
BOROKO


Swit moa, samting tru



Em Hutton's tasol..



GSH03



PIKININI TANIM OLSEM PISIN KOKI

Bipo bipo tru, wanpela man na meri i marit na i stap, na tupela i gat wanpela pikinini tasol. Long taim meri i save go long gaden, em i save kisim pikinini i go wantaim em long gaden.

Long taim tupela i kamap pinis long gaden, meri ya i no save givim susu long pikinini pastaim na bihain go wok long gaden. Nogat. Em i save go stret na wok long gaden. Na taim pikinini i hangre, em i save kraik.

Meri ya i save harim,

tasol em i no save kam kwiktaim na givim susu long pikinini bilong em. Nogat. Em i save wok tasol na i stap. Em i save tok olsem, yu save wok long gaden tu a? Meri i tok olsem, na tarangu pikinini i kraik yet, na klostu nek bilong em i laik pas nau, em i save kam na givim susu long em. Na taim em i givim susu pinis, em i save paitim em gen.

Meri ya i save mekim olsem olgeta taim long pikinini bilong em. Wanpela taim, tupela i go gen long gaden, na man bilong

em i go long bus na painim abus. Na taim meri i kisim pikinini i go, em i mekim wankain pasin nogut long em long gaden. Olsem na taim pikinini i wok long kraik yet, skin bilong em i senis na tanim olsem pisin ya ol i kolim Koki.

Olgeta skin bilong em i kamap olsem gras bilong koki, tasol maus tasol i no tanim yet olsem koki. Na bihain em i plai i go antap long rop bilong mami na yam na em i singautim mama bilong em. Em i tok, mama yu lukim mi. Na taim mama bilong em i

tanim, em i lukim koki tasol, na em i no lukim pikinini bilong em.

Mama ya i kirap na stat long kraik long pikinini bilong em. Na pikinini ya i kirap tokim mama bilong em olsem. Mama bilong yu i stap, bihain orait yu ken givim long narapela pikinini. Mi no pikinini bilong yu tru, olsem na yu save oltaim mekim dispela pasin nogut long mi.

Nau mama bilong em i kraik nogut tru, na em i traim long holimpas koki

tasol em i tanim olgeta olsem koki na plai i go olgeta long bik bus tru. Em i singaut olsem pisin koki tru na plai i go olgeta. Long taim em i singaut olsem koki, papa bilong em i wok long bihainim ol abus. Em i harim singaut na em i tingting, hei wanem kain pisin tru ya?

Em i harim olsem na em i pret nogut tru. Olsem na em i ranawe i go bek long ples. Na taim em i kamap, em i lukim na harim meri bilong em i kraik i stap. Na em i kam na askim em. Yu kraik long wanem tru? Na meri ya i tokim em long olgeta stori.

Na man i harim olsem na em tu i kirap na stat long kraik i go na tupela i dai insait long haus. Na tupela i tanim olsem "Womponko Ston".

Em tasol long liklik stori bilong mi. Tenkyu.

Tobias Walop Korupu,
 Dreikikir/E.S.P.

TAMBU TORO



PES TAIM TRU BILONG TORO LONG BAIM TOS, OLSEM NA EM TOKIM STOKIPA LONG BEEM TOS NA NAU EM I KARIM GO LONG ROT



TAIM EM GO PAIS LONG HAUS EM NO SAVE LONG KIKIM DAI LAIT BILONG TOS, OLSEM NA EM WANIM TOS TASOL I NO DAI LAIT ISPAK YET.



EM NO PAIA NA YU LAIK WANIM DAI LAIT. YU MAS PUSIM BATEN OLSEM NA BAI DAI.

MI TING EM WANKAIN O EM PAIA LONG HAUS.

Sande Lotu

Frank Mihalic i raitim

SANDE NAMBA 20 BILONG YIA

19 Ogas, 1979 — Jon 6: 51 — 59.

Ol strongpela tok tru bilong bodi na blut bilong Jisas i stap long ol dispela lain bilong rit bilong tude. "Sapos yupela i no kaikai bodi bilong mi . . . bai yupela i no gat laip long yupela" "Man i kaikai bodi bilong mi — em i stap long mi, na mi stap long em." "Man i kaikai mi, em bai kisim laip long strong bilong mi." Em ol i strongpela tok ya. Stongpela tru. Nau yumi tingting liklik long ol.

Man i kisim bodi na blut bilong Jisas, em i save kisim long taim bilong lotu komunio, o long taim bilong lotu misa. Long dispela taim ol kristen i makim wanpela kaikai: i gat tebol na i gat kaikai antap long en. Dispela aidia bilong kaikai i stap, na aidia bilong sindaun kaikai wantaim, em i gat gutpela mining long en.

Namba wan lo tru bilong laip na bilong bodi bilong yumi em hia: yu mas kaikai. Pikinini i kamap nupela, wantu em i pulim susu. Man i no laik kaikai, em i gat sik. Man i no inap kaikai, bai em i dai.

Olgeta samting yumi save kaikai, dispela samting i gat laip bilong en pastaim. Yumi ting long abus na pis na sayor na rais na saksak na kaukau. Olgeta dispela samting i gat laip. Tasol wan wan i mas lusim laip bilong em, bai mipela i ken kaikai. Laip bilong yumi i hangamap long indai bilong olkain kaikai. Olsem tasol, laip bilong spirit bilong yumi i hangamap long indai bilong Jisas. Bodi bilong Jisas i olsem ol arapela kaikai, em i pinisim laip bilong em bilong givim laip long yumi.

Orait, i tru ol kaikai i lusim laip. Yumi save katim long tit na brukbrukim na daunim na em i lus insait long bodi bilong yumi. Yes, ol kaikai ya i dai pinis. Tasol nau yu lukim. Bodi bilong yumi i kisim dispela kaikai i go insait long blut. Orait, nau kaikai ya i senis na i kisim laip gen, i kamap hap bilong bodi yumi i kamap han o lek o het samting i gat laip. Olaboi, em i samting tru! I no gat wanpela saveman long dispela graun inap long givim laip long samting i dai pinis. Na bodi bilong yumi i save mekim olgeta de. Kalapa!

Ol dispela samting i makim komunio, i makim bodi na blut bilong Jisas, yumi save kisim. Tasol Jisas i no lusim laip moa. Nau em i go insait long yumi na em i givim moa moa laip long yumi. I givim moa na moa strong long yumi.

Pasin bilong sindaun kaikai raun long wanpela tebol, em tu i makim gut astingting bilong komunio, o pasin bilong kisim bodi na blut bilong Jisas. Sindaun kaikai wantaim, em i pasin bilong ol pren. Sindaun kaikai wantaim em i save pasin kontrak.... olsem long marit. Taim bilong kaikai, em i taim bilong malolo, taim bilong kisim win, taim bilong amamas, taim bilong belgut. Tupela birua i no ken kamap wansospen, wanplet, wantebol. Long sampela kantri sapos tupela marit i brukim tebol, em i min tupela i katim marit.


Tru tumas, sindaun kaikai wantaim Jisas long komunio, em i gutpela mak tru bilong soim yu gutpren bilong em.

GOD I BEKIM PINIS BETEN BILONG DEVIT. LONG MONINGTAIM TRU DEVIT I KISIM OL SOLDIA BILONG EN I GO BEK LONG TAUN BILONG OL. NA OL SOLDIA BILONG FILISTIA I WOKABAUT I GO LONG PAIT.

Sel I Go Long Masalai Meri

1 Samyuel 28:5-11 29

TAIM SOL I LUKIM STRONGPELA AMI BILONG FILISTIA, EM I PRET. EM I KIRAP NOGUT NA I SINGAUT LONG GOD LONG HELPIM EM. TASOL GOD I NO BEKIM EM. OLSEM NA EM I PRET NA I SINGAUTIM WANPELA WOKBOI BILONG EN I KAM.



Used by permission of the David C. Cook Foundation. Copyright 1973, David C. Cook Publishing Co. All rights reserved.

Komik hia i kamap pinis long buk. Yu inap baim long olgeta Kristen Buk Stua.




Ol Sagot i kolim dispela ples: ston bilong kaikai na pati. Tasol ol Mahar i save kaikai aninit long wara tasol.

Tarzan

by EDGAR RICE BURROUGHS®

TARZAN - Trademark TARZAN Owned by Edgar Rice Burroughs, Inc. and Used by Permission



Tarsan i pret nau. Em i lukim ol Mahar i lukluk long em na em i save pinis, nau ol i toktok long wailes bilong ol, wantaim ol Sagot i stap nabaut long graun.

© 1978 United Feature Syndicate, Inc.



Yutupela man bilong graun i laki tru. Ol bikmasta i no laik kilim yutupela nau. Ol i laik holim yutupela bilong ol yet.





Tarsan na Dian i pas pinis long lek bilong ol bikpela snek i gat wing, ol i olsem bikpela tarangau tru.

Russ Manning #2473 7-30



EEEE!
TARZAN!

SPOT PES



Soka i kirap gen long Mosbi. Poto long rait-han yu lukim Yunipilai wantaim Guria. Andrew Waho bilong Guria i wok hat long kisim bal long Philip Wori bilong Yuni. Tupela i pilai long Bisini Parad long arapela wik bipo. Long lephan yu ken lukim wanpela P.W.D. pilaia i wok long pasim bol.

PORT MORESBY SOKA ASOSIESEN

DRO BILONG 11 & 12 OGAS, 1979

SARERE 11

Taim	Ples	Gred	Tim	Ref
12.45	Boroko	U/19	Kapit Vs Solo	Philip Ragi
1.55	No. 1	4th	Mannah Vs Bunbun	Jimmy Mata
3.05	No. 1	2nd	Kruf Vs Batisalem	John Wesley
4.10	No. 1	1st	Elcom Vs Admiralty	Daniel Stephen
12.45	Boroko	4th	Movei Vs Cape Nelson	Kepi Joseph
1.55	No. 2	3rd	Ali United Vs Haus Bilas	Oksi Kaem
3.05	No. 2	2nd	Defence Vs Amoana	Mao Sapek
4.10	No. 2	1st	Kiriwina Vs Manolos	Napoleon Liosi
12.45	Defence	3rd	Luth Yth Vs Waicom	Nasinum Panga
1.55	Defence	3rd	Papane Vs I. Ranges	Lindsay Simeon
3.05	Defence	3rd	G/Enough Vs Paramana	Zinga Mela
4.10	Defence	1st	Kunta Vs Maegin	Amos Misirait
3.05	Adcol	3rd	Cigga Vs Tokanen	

SANDE 12

Taim	Ples	Gred	Tim	Ref
12.45	Boroko	U/19	Public Works Vs Sunam	Kepi Joseph
1.55	No. 1	4th	NDR Vs Livapul	Gabriel Samol
3.05	No. 1	4th	Paradise Vs Jets	Dina Kofomu
4.10	No. 1	2nd	Air Niugini Vs Kula	Darryl Hill
12.45	Boroko	U/19	Idubada Vs Tarangau	Detu Amkun
1.55	No. 2	U/19	Uni Vs Guria	David Kambe
3.05	No. 2	2nd	Co-op Vs C. Vogel	Hans Rademacher
4.10	No. 2	2nd	Blue Kumuls Vs Ilimo F.	Seve Otara
12.45	Defence	4th	Amuyawa Vs Somba	Mao Sapek
1.55	Defence	U/19	Sogeri Vs G.F.C.	Stephen Pouru
3.05	Defence	1st	Cape Wood Vs Ke Club	Maso Salaiu
4.10	Defence	1st	Seminary Vs Togelu	Martin Pouru

TUPELA NOTIS

* Olgeta kaptan i mas ringim Poundford long telipon namba 27 3541 na givim gol bilong ol pilai long em long Mande moning yet.

* Olgeta refri i mas kamap long jenerel miting long Boroko Soka Graun long Ogas 12, 1979. Miting bai i stat long 9 klok long moning.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.